

«Mo igl emprem da biars pass pigns»

La gievgia ha il marcau da Glion festivau la surdada dil label sco «marcau d'energia»

DA SUSI ROTHMUND / ANR

■ A caschun d'ina fiastetta ha il cusseglier guvernativ Mario Cavigelli surdau la gievgia sera al marcau da Glion il label sco «marcau d'energia». Il president dil marcau, Rino Caduff, ha declarau cun contentiensa ch'il marcau hagi contonschiu cun quei label ina finamira intermediara per ina politica d'energia consequenta e durabla. «La distincziun sco 'marcau d'energia' ha buca mo en Svizra ina gronda impurtonza e valor, mobein era suls cunfins», ha Ulrich König, commember dalla suprastanza dall'uniun purtadra «marcau d'energia» e directur dall'Associaziun dallas vischnauncas svizas, declarau a caschun dalla fiastetta da surdada che ha giu liug en l'aula dalla scola dil marcau. El seigi loschs d'astgar undrar in commember dall'associaziun cun quella distincziun. Gia avon la catastrofa el Giapun seigien biaras vischnauncas stadas cunscientas che l'effizienz d'energia stoppi vegnir augmentada e novas energias promovidas. A Glion ei vegniu prestau gronda lavur preparatorica durant dus onns. Ussa ch'il marcau ha astgau retscheiver ord ils mauns dil cusseglier guvernativ Mario Cavigelli il label astga el senumnar officialmeins «marcau d'energia». Tenor Ulrich König eis ei d'engraziar alla cumissiun d'energia che vegn menada dil cusseglier dil marcau Gerold Hafner ch'il marcau ha priu la via en direcziun «marcau d'energia» e surmontau ils obstachels per contonscher il label. Dalla cumissiun d'energia da Glion fan part Brida Camenisch, Armin Candrian, Lydia Duff, Roman Schlosser e



Fatschas cuntenzas a caschun dalla surdada dil label per il «marcau d'energia» Glion: Ulrich König, Armin Candrian, Roman Schlosser, Gerold Hafner, Lydia Duff, Brida Camenisch, Rino Caduff e Mario Cavigelli (da sen.).

FOTO S. ROTHMUND

Gerold Hafner. La cumissiun d'energia ha gaudiu il sustegn efficazi digl uffeci da construcziun, oravontut da Norbert Carigiet ed era dil cussegliader per marcaus d'energia Christian von Ballmoos.

Il label sco sfida

«Il label dil 'marcau d'energia' ei ina distincziun, mo era ina obligaziun ed ina sfida per nus tuts», ha Gerold Hafner puntuau ed appellau ils da Glion da s'annunziar sch'ei hagian ulteriuras ideas, interess da s'engaschar en ina grupp da lavur ni propostas per in marcau ecologicamein gest. Igl emprem pass seigi fats, ulteriurs vegnien a suandar. Leutier stoppi denton mintga habitont da Glion contribuir, vi-

navon vegni ins era cun pass pigns e buca mo cun gronds. Ella medema crena ha Mario Cavigelli dau e menziunau ch'ei detti uss el Grischun 15 vischnauncas cun quei label. En relaziun seigi quei pauc, mo la fin finala vivan rodond 82 000 persunas en quellas e quei corrispundi a rodond 43 pertschien dalla populaziun. La media svizra munti a 46 pertschien. Sco il president dil marcau ed ulteriurs plidaders ha era il cusseglier guvernativ appellau a mintgin da contribuir il siu e da spargnar ed ir entuorn a moda efficacia cun l'energia.

Glion e la politica d'energia

Igl emprem marcau spel Rein ha gia fatg

enzacons pass impurtonts per ina politica d'energia consequenta e durabla. Tier quels s'audan il scaldament dil bogh aviert cun in indrez solar, la proxima realisaziun digl implont da scaldar cun lenna, l'ovra d'aua da beiber dil Provediment d'aua Gruob, la reit per traffic plaun e biaras autras mesiras. Da principi prevesa la politica d'energia dil marcau d'augmentar l'effizienz d'energia tier agens, mo era tier baghetgs en auters mauns, d'augmentar la cumpart d'energia regenerabla e la cumpart da forza electrica ecologica. «Ina impurtonza finamira ein ina extendida comunicaziun e la sensibilisaziun pil tema e quei tier la populaziun ed en scolas», ha Rino Caduff declarau.